



**KENYATAAN MEDIA**

**PEMAKLUMAN OPERASI**  
**MAHKAMAH SYARIAH NEGERI SELANGOR**

**SHAH ALAM, 3 Mei 2020**

Selaras dengan Perintah Kawalan Pergerakan Bersyarat (PKPB) yang diumumkan oleh YAB Perdana Menteri Malaysia pada 1 Mei 2020 dan Arahan Hadir Bekerja Semasa Tempoh Perintah Kawalan Pergerakan Bersyarat Di Pentadbiran Setiausaha Kerajaan Negeri Selangor oleh Pejabat Setiausaha Kerajaan Negeri Selangor Darul Ehsan bertarikh 2 Mei 2020 bersamaan 9 Ramadhan 1441H, operasi Mahkamah Syariah seluruh Negeri Selangor akan bermula secara berperingkat seperti berikut:

(a) 4-12 Mei 2020

Operasi secara dalaman yang melibatkan warga kerja Jabatan Kehakiman Syariah Selangor (JAKESS) yang dijadualkan bertugas di pejabat dimulakan **tanpa melibatkan kehadiran “walk in client” atau pelanggan yang hadir tanpa temu janji secara fizikal**. Mana-mana pelanggan yang berhasrat untuk memfailkan atau memohon pendengaran kes-kes dengan segera hanya akan dilayan melalui temu janji dan dengan mengemukakan Surat Perakuan Segera kepada Mahkamah. Para pelanggan masih boleh mendapatkan perkhidmatan runding cara melalui talian telefon. Pengendalian kes jenayah yang baharu yang melibatkan permohonan jamin boleh dibuat dengan menghubungi Pendaftar Mahkamah Syariah Selangor yang berkaitan.

Sepanjang tempoh ini, JAKESS akan merancang dan melaksanakan kerja-kerja persiapan bagi memulakan perkhidmatan kepada pelanggan yang akan hadir secara fizikal pada tarikh yang ditetapkan. Ini bagi memastikan JAKESS benar-benar bersedia untuk mengendalikan pelanggan yang hadir berurusan secara teratur dan lancar selaras dengan peraturan yang ditetapkan di bawah Akta Pencegahan dan Pengawalan Penyakit Berjangkit 1988 [Akta 342].

(b) Mulai 13 Mei 2020 hingga pemakluman rasmi lain dikeluarkan

Operasi melibatkan **perkhidmatan kepada pelanggan yang hadir secara fizikal dimulakan tanpa temujanji**. Walau bagaimanapun, perkhidmatan yang ditawarkan adalah **terhad** kepada perkhidmatan seperti berikut:

- (a) Pemfailan dan perbicaraan kes tuntutan fasakh dengan alasan berlaku keganasan rumah tangga (disokong dengan Laporan Polis dan Laporan Perubatan);
- (b) Pemfailan dan perbicaraan kes pengesahan lafaz cerai di luar mahkamah;
- (c) Pemfailan dan perbicaraan kes penceraian dengan persetujuan bersama antara suami dan isteri;
- (d) Pemfailan dan merekodkan apa-apa kes yang berjaya mencapai penyelesaian secara persetujuan bersama;
- (e) Pemfailan kes yang melibatkan tempoh dan had masa (Contoh: Notis Rayuan);
- (f) Pemfailan dan perbicaraan kes permohonan Injunksi; dan
- (g) Pengambilan perintah meterai bertulis (Perlu buat temu janji awal terlebih dahulu).

Selain perkhidmatan untuk mengambil perintah meterai bertulis, semua kes yang hendak difailkan atau dibicarakan mestilah disertakan dengan Surat Perakuan Segera yang menyatakan alasan-alasan yang menyokong permohonan untuk kes-kes tersebut dibenarkan untuk difailkan dan dibicarakan.

Operasi perkhidmatan kaunter JAKESS adalah seperti berikut:

Tarikh mula perkhidmatan : 13 Mei 2020 (Rabu)  
Waktu operasi : Isnin hingga Jumaat  
(8.00 am – 1.00 pm)  
(2.00 pm – 3.00 pm)

Walaupun bagaimanapun sebagai langkah kawalan dan pencegahan, semua pelanggan yang hadir ke Mahkamah dikehendaki memakai topeng muka (*face mask*), diwajibkan melalui saringan kesihatan dengan mengimbas suhu badan di laluan masuk yang ditetapkan, mengimbas “QR Code” yang diletakkan di pintu masuk Mahkamah Syariah seluruh Selangor dengan menggunakan telefon bimbit masing-masing, memastikan penjarakan sosial dilaksanakan dan langkah-langkah lain yang telah ditetapkan oleh Kementerian Kesihatan Malaysia.

Pelanggan dilarang sama sekali untuk membawa kanak-kanak semasa berurusan di Mahkamah Syariah Selangor. Bagi mengekalkan penjarakan sosial, hanya pelanggan

yang memenuhi syarat-syarat yang ditetapkan di atas sahaja yang akan dibenarkan masuk ke dalam premis mahkamah.

Pelanggan yang menghadapi masalah kesihatan dinasihatkan untuk menangguhkan hasrat untuk hadir ke Mahkamah sehingga benar-benar sembuh.

Sebarang pertanyaan boleh dibuat dengan menghubungi talian telefon premis Mahkamah Syariah Negeri Selangor yang berkaitan seperti tertera di laman sesawang JAKESS [www.jakess.gov.my](http://www.jakess.gov.my)

**Dikeluarkan oleh:**  
**Unit Komunikasi Korporat**  
**Jabatan Kehakiman Syariah Selangor**